

## NOTA DE PRENSA

# **O MUNDO RURAL SAE Á RÚA DE COMPOSTELA O PRÓXIMO DOMINGO, 3 DE XUÑO, PARA PEDIR QUE SE RECOÑEZA O SEU LABOR ECONÓMICO, SOSTIBLE E MEDIOAMBIENTAL**

- O acto, que non é contra ninguén, está convocado por organizacións agrarias, forestais, do mundo da caza e da pesca baixo o lema “Creamos natureza e vida no rural. Non somos o problema, somos a solución”
- Os participantes congregaranse as 11:00 horas na Alameda para facer un percorrido ata a Praza da Quintana onde se lerá un manifesto a favor do mundo rural e das actividades que se desenvolven nel

*Santiago de Compostela, 31 de maio 2018.-* Organizacións agrarias, forestais e do mundo da caza e da pesca fan un chamamento á sociedade galega a participar na mobilización que terá lugar este domingo, 3 de xuño, en Santiago de Compostela, co gallo de poñer en valor as actividades que se desenvolven no mundo rural que son as que están a favorecer fixar poboación e riqueza no rural para mantelo vivo e activo. Baixo o lema “Creamos natureza e vida no rural. Non somos o problema, somos a solución”, congregaranse as 11:00 horas na Alameda da capital galega para percorrer as rúas de Porta Faxeira e do Vilar ata chegar á Praza da Quintana onde se lerá un manifesto a favor do mundo rural.

A mobilización, que non é contra ninguén, xurde en resposta ao abandono que está a sufrir o mundo rural. Cómpre que a sociedade tome conciencia que se persiste o abandono do rural galego, só é cuestión de tempo unha catástrofe social e medioambiental. Por iso, os organizadores da marcha convidaron a todos os partidos políticos a participar nesta iniciativa para amosar que se trata dunha reivindicación dunha vida digna e un futuro próspero para o mundo rural, e non contra ninguén.

Unha silvicultura activa, integrada cun sector agrogandeiro activo, e unha mellor xestión e sustentabilidade son claves para o devenir do rural. Solucións que requiren plantexamentos a longo prazo e cun apoio decidido de toda a sociedade para aproveitar as oportunidades que supoñen a bioeconomía, o coidado do medio ambiente e os novos usos do territorio, cambiando o abandono por unha fonte de riqueza e orgullo.

A mobilización deste domingo pretende visibilizar o labor que desenvolven os diferentes sectores que forman parte do medio rural, reivindicando o seu papel de protectores dun patrimonio que é beneficio de todos. Esquécese en moitas ocasións este papel dos que están a velar polo futuro do mundo rural, investindo nel dende os distintos sectores e evitando o seu abandono e deterioro medioambiental.

Por iso, convidan á sociedade galega a sumarse a esta mobilización amigable para amosar que estas actividades e sectores son indispensables no territorio, non existindo opcións afrontadas no rural galego e contribuíndo todos os sectores á sostenibilidade económica, á súa riqueza cultural e á xestión e protección do medio ambiente.

## Decálogo en defensa do mundo rural

Con todo isto, todos os sectores que forman parte do mundo rural lanzan un decálogo na súa defensa co que desexan compartir coa sociedade cal é a aportación que realizan e porque as actividades que se desenvolven no rural son fundamentais para asegurar o seu futuro. O que salientan neste decálogo é o seguinte:

- O rural de Galicia merece un futuro e somos nós que o temos que construír defendendo actividades e servizos de calidade que axuden a fixar poboación para manter un rural vivo e activo
- Queremos un rural produtivo e sustentable como garante de respecto ao medioambiente para manter un patrimonio natural que sexa motivo de orgullo para todos os galegos
- Sen o sector primario, sen o seu traballo diario, sen os seus pastos, cultivos, terras de labor que actúan de cortalumes naturais, non hai protección posible contra as vagas de lumes catastróficas que ameazan todos os veráns a gran parte da superficie forestal de Galicia
- Unha xestión forestal sostible crea riqueza e xera emprego, á vez que coída o monte e fixa dióxido de carbono, depurando as augas e loitando contra o cambio climático
- Hai que defender un rural produtivo que complemente as rendas das familias que nel habitan, producindo madeira e outras materias primas renovables, claves para a bioeconomía do século XXI
- Reivindicamos o noso dereito a cazar e o respecto á Caza como ferramenta de xestión para o aproveitamento sostible das especies que permita controlar as súas poboacións; sobre todo, as especies de caza maior, en busca do equilibrio medioambiental, minimizando os danos aos cultivos, que farían inviable a agricultura e gandería en Galicia e contribuíndo á seguridade viaria nas estradas galegas. Ao tempo que a caza actúa como factor limitante da propagación de graves enfermidades para a fauna doméstica
- Queremos defender uns montes veciñais multifuncionais que sigan conservando o seu carácter de propiedade comuneira evitando calquera usurpación ou intento de privatización
- A Pesca Fluvial xestiona e mellora os ecosistemas piscícolas dos nosos ríos, achega os cidadáns á natureza e, xunto á Caza, xera actividade económica desestacionalizada no noso rural, especialmente nas áreas máis deprimidas e desfavorecidas
- Non nos resignamos a asistir ao declive social, demográfico e cultural do rural galego sen dicirlle á sociedade que somos necesarios para construír un gran futuro conxunto no que queda moito por facer e do que queremos ser parte importante, necesaria e activa
- Os habitantes do rural e as actividades que nel se desenvolven non son un problema para o medio ambiente galego, senón son a solución aos seus problemas de conservación

Por todo isto, os sectores que forman parte das actividades do mundo rural, animan a todos a participar na mobilización do domingo, 3 de xuño, e que axude a garantir un futuro para o mundo rural.